

**Pwyllgor yr Economi,
Masnach a Materion Gwledig**

**Economy, Trade and
Rural Affairs Committee**

Senedd Cymru

Bae Caerdydd, Caerdydd, CF99 1SN
SeneddEconomi@senedd.cymru
senedd.cymru/SeneddEconomi
0300 200 6565

Welsh Parliament

Cardiff Bay, Cardiff, CF99 1SN
SeneddEconomy@senedd.wales
senedd.wales/SeneddEconomy
0300 200 6565

Lesley Griffiths AS
Y Gweinidog Materion Gwledig a Gogledd
Cymru, a'r Trefnydd

30 Mawrth 2022

Annwyl Weinidog,

Fframwaith Cyffredin Dros Dro ar Wrteithiau

Diolch unwaith eto am ddod i gyfarfod y Pwyllgor ar 17 Mawrth ar gyfer gwaith craffu cyffredinol ac i ateb rhai o'm cwestiynau ar broses y fframweithiau cyffredin. Mae'r Pwyllgor hefyd yn ddiolchgar am bresenoldeb swyddogion Llywodraeth Cymru i ddarparu briff technegol preifat ar rai fframweithiau y mae'r Pwyllgor wedi'u blaenoriaethu ar gyfer gwaith craffu. Roedd y sesiwn frifio'n ddefnyddiol iawn. O ystyried natur gymhleth a thechnegol y fframweithiau, cytunodd yr Aelodau y byddai'n ddefnyddiol nodi'r cwestiynau a ofynnwyd ganddynt yn breifat eto mewn gohebiaeth, fel y gellir cofnodi ar goedd y cwestiynau a'r ymatebion ac er mwyn hysbysu rhanddeiliaid. Mae'r cwestiynau i'w gweld o dan y penawdau isod, gan gynnwys rhai nas cyrhaeddwyd yn ystod y sesiwn frifio. Edrychwn ymlaen at gael eich ymateb ysgrifenedig ar yr holl bwyntiau hyn:

Cwmpas y fframwaith

- A allwch egluro cwmpas y fframwaith ac a yw'n ymwneud yn unig â rheoli rheoleiddio a oedd gynt yn cael ei lywodraethu gan yr UE neu'r holl reoliadau a pholisi gwrteithiau?
- Os oedd yn ymwneud â'r holl reoliadau a pholisi, a allwch egluro sut mae hyn yn wahanol i'r ffordd yr oedd cyfraith a pholisi gwrteithiau yn cael eu llywodraethu cyn i'r DU ymadael â'r UE?



**Senedd Cymru
Welsh Parliament**

- A allwch gadarnhau a oes gan Lywodraeth Cymru yr un hyblygrwydd i ddatblygu cyfraith a pholisi gwrteithiau a oedd ganddi cyn diwedd y cyfnod pontio?
- A allwch nodi pa fframweithiau eraill y mae'r fframwaith hwn yn rhyngweithio â hwy a sut y caiff y rhyngweithio hynny ei reoli?
- A allwch gadarnhau a fyddai rheoliadau sy'n ymwneud â rheoli llygredd amaethyddol yn dod o fewn cwpas y fframwaith cyffredin?

Proses gwneud penderfyniadau yn y fframwaith

- A allwch ddarparu enghreifftiau o'r mathau o benderfyniadau a wneir drwy'r fframwaith ar bolisiâu a chyfreithiau?
- A allwch egluro pa rai fydd y prif grwpiau a fydd yn ymwneud â gwneud penderfyniadau a pham mae'r fframwaith yn anghyson wrth gyfeirio atynt?

Rheoli ymwahanu drwy'r fframwaith

- Defnyddir termau gwahanol i ddisgrifio ymwahanu yn y fframwaith. Ar ba sail y bydd partïon i'r fframwaith yn penderfynu a yw unrhyw ymwahanu arfaethedig yn 'dderbyniol' neu'n 'niweidiol'?
- Mae'r disgrifiadau o bwy fydd yn ymwneud â datrys anghydfodau yn aneglur. A allwch nodi pa strwythurau a grwpiau a fydd yn ymwneud â datrys anghydfodau?
- A allwch chi esbonion sut y caiff yr ymwahanu rhwng Prydain Fawr a Gogledd Iwerddon ei reoli drwy'r fframwaith, o gofio y bydd yn ofynnol i Ogledd Iwerddon ddilyn strwythurau rheoleiddio newydd yr UE ar wrteithiau?
- A allwch egluro rôl Pwyllgor Rheoleiddio Gwrteithiau'r DU (UKFRC) o'i chymharu â rôl y Grŵp Cyswllt Gwrteithiau? Pwy fydd yn cadeirio UKFRC?
- A allwch roi enghraifft o sut y bydd y chwe amcan a amlinellir yn y fframwaith yn cael eu defnyddio i wneud penderfyniadau o dan y fframwaith?
- A allwch esbonio pam nad yw'r fframwaith yn darparu amserlenni ar gyfer gwneud penderfyniadau ac a oes perygl gallai hyn arwain at oedi i brosesau gwneud penderfyniadau?



- Mae fframweithiau eraill yn nodi y dylai'r partïon ymgynghori â'i gilydd ynglŷn â newidiadau polisi arfaethedig hyd yn oed cyn iddynt ymgysylltu â rhanddeiliaid ynglŷn â newidiadau arfaethedig. A allech gadarnhau a yw hyn yn wir am y fframwaith hwn?
- Mae Llywodraeth Cymru wedi dweud ei bod yn disgwyl i'r Memorandwm Cydddealltwriaeth ar ddatganoli fynd yn 'segur' wrth i strwythurau cysylltiadau rhynglywodraethol newydd gael eu rhoi ar waith. A allwch esbonio goblygiadau hyn i'r fframwaith hwn?

Datrys anghydfodau

- Ni phennwyd terfynau amser ar gyfer datrys anghydfodau. A oes perygl y gallai hyn effeithio ar gyflawni polisi a chyfraith yng Nghymru?
- O dan ba amgylchiadau y bydd partïon yn gallu 'cytuno i anghytuno'? Pa risgiau ydych chi wedi'u nodi o ran y dull hwn?

Deddf Marchnad Fewnol 2020 y DU

- Sut mae'r fframwaith yn rhyngweithio â Deddf Marchnad Fewnol y DU?
- A yw Llywodraeth Cymru yn bwriadu ceisio eithriad ar gyfer y fframwaith hwn o Ddeddf Marchnad Fewnol y DU?

Effaith ar Gyfraith a Pholisi

- A fydd y Bil Amaethyddiaeth yn cynnwys darpariaethau ar wrteithiau? Os bydd, a yw'r cynigion hyn wedi bod drwy broses y fframwaith? Os na fydd, a yw hyn oherwydd penderfyniadau a wnaed drwy'r fframwaith?
- Os yw darpariaethau'n cael eu gwneud yn y Bil, sut y bydd y rhain yn cydfynd â'r ymrwymiad yn y fframwaith i ddefnyddio pwerau rheoleiddio ar wrteithiau yn unol ag egwyddorion y fframwaith?

Tryloywder ac atebolrwydd

- A wnaethoch chi ymgynghori â rhanddeiliaid wrth ddatblygu'r fframwaith?
- Mae ymgysylltu â rhanddeiliaid wedi'i gynnwys fel amcan allweddol ar gyfer y fframwaith, ond nid oes unrhyw brosesau wedi'u cynnwys ynddo i rhanddeiliaid



fod yn rhan o'r broses o wneud penderfyniadau, yn y casglu tystiolaeth nac yn y gwaith adolygu a diwygio. A allwch egluro pam, a sut yr ymdrinnir â hyn?

- Mae'r fframwaith yn nodi bod diwygio ar raddfa eang o reoleiddio gwrteithiau ar y gweill a bydd y fframwaith yn cael ei adolygu yng ngoleuni hyn. Sut y byddwch yn cynnwys y Senedd mewn unrhyw broses adolygu a diwygio?

Cwestiynau eraill

- Mae'r fframwaith yn cynnwys nifer o wallau, a thermau heb esboniad ac anghyson. A allwch chi egluro pam na roddwyd sylw i'r rhain drwy brosesau cymeradwyo mewnol cyn cyhoeddi?

Edrychwn ymlaen at drafod fframweithiau cyffredin â chi eto yn y dyfodol agos, ond, yn y cyfamser, diolch i chi ymlaen llaw am ddarparu'r wybodaeth ychwanegol y gofynnir amdani uchod. Byddai ymateb erbyn 29 Ebrill o gymorth i'r Pwyllgor.

Cofion cynnes,



Paul Davies AS

Cadeirydd: Pwyllgor yr Economi, Masnach a Materion Gwledig

Croesewir gohebiaeth yn y Gymraeg a'r Saesneg / We welcome correspondence in Welsh or English.

